



**REPUBLIKA E SHQIPËRISË**  
**Kuvendi**

**PROJEKTLIGJ**

Nr. \_\_\_\_\_ / 2014

**PËR**

**DISA SHTESA DHE NDRYSHIME NË LIGJIN NR.8438,**  
**DATË 28.12.1998, “PËR TATIMIN MBI TË ARDHURAT”,**  
**TË NDRYSHUAR**

Në mbështetje të neneve 78, 83, pika 1, dhe 155, të Kushtetutës, me propozimin e Këshillit të Ministrave, Kuvendi i Republikës së Shqipërisë

**V E N D O S I:**

Në ligjin nr.8438, datë 28.12.1998, “Për tatimin mbi të ardhurat”, të ndryshuar, bëhen këto shtesa dhe ndryshime:

**Neni 1**

Pas pikës 11, të nenit 8/1, shtohen pikat 12 dhe 13, me këtë përmbajtje:

“12. Kontributi i bërë nga çdo anëtar i një fondi të pensionit vullnetar deri në masën e përcaktuar në ligjin për fondet e pensionit vullnetar si dhe kontributet e bëra nga punëdhënësi ose çdo kontribues tjetër, në emër dhe për llogari të anëtarit të fondit të pensionit vullnetar.

13. Kthimi i investimit, përfshirë fitimet nga kapitali prej investimeve të kryera me asetet e fondit të pensioneve.”.

## **Neni 2**

Pika 2, e nenit 9, ndryshohet, si më poshtë vijon:

“2. Dividendët, të ardhurat që rrjedhin si fitim i ortakut, qoftë ky ortak i vetëm, interesat nga huatë, depozitat ose kontrata të ngjashme, të ardhurat nga e drejta e autorit ose pronësia intelektuale, të ardhurat nga lojërat e fatit, si dhe të gjitha shpërblimet apo të ardhurat e tjera, që nuk parashikohen ndryshe në dispozita të tjera të këtij ligji, taten me 15 për qind.”.

## **Neni 3**

Në nenin 11 bëhen këto ndryshime:

1. Fjalja e parë, e pikës 1, ndryshohet, si më poshtë vijon:

“Kalimi i së drejtës së pronësisë mbi pasuritë e paluajtshme, tokë ndërtesa, taten me 15 për qind të fitimeve të realizuara.”.

2. Në pikën 3, fjalët “... pas 10 (dhjetë) ditëve ...” zëvendësohen me “... brenda datës 20 të muajit pasardhës ...”.

## **Neni 4**

Në nenin 13/2 bëhen këto ndryshime:

1. Shkronja “a” ndryshohet, si më poshtë vijon:

“a) Të ardhura bruto nga paga apo shpërblimet nga marrëdhëniet e punësimit për individët dhe të fitimit të tatueshëm nga zhvillimi i veprimtarisë së bizneseve që realizojnë gjatë vitit fiskal një qarkullim nga 0 deri në 8 000 000 lekë, sipas Deklaratës së Tatimit të Thjeshtuar mbi fitimin.”.

2. Shkronja “gj” shfuqizohet.

## **Neni 5**

Shkronjat “a” dhe “ç”, të pikës 1, të nenit 13/3, shfuqizohen.

## Neni 6

Neni 13/6 ndryshohet, si më poshtë vijon:

### “Neni 13/6 Tatimi për t’u paguar

1. Diferenca ndërmjet totalit të të ardhurave bruto me shpenzimet e zbritshme sipas nenit 13/3, të ligjit, dhe të ardhurat nga punësimi përbën të ardhurën e tatueshme të individit.
2. Kjo e ardhur e tatueshme tatohet sipas shkallës tatimore në përputhje me normat tatimore, të përcaktuara në nenet 9 dhe 11, me përjashtim të të ardhurave nga punësimi, të deklaruara dhe të tatuara nga punëdhënësi me tarifatat progresive, sipas këtij ligji.
3. Shumës së tatimit të llogaritur sipas pikës 2, të këtij neni, i zbriten tatimet e paguara gjatë periudhës taimore të dokumentuara nga mbajtësi nën burim i këtyre tatimeve.

Tatimi i llogaritur dhe tatimi për t’u paguar nga zhvillimi i veprimtarisë së bizneseve, që realizojnë gjatë vitit fiskal një qarkullim nga 0 deri në 8 000 000 lekë, është tatimi i paguar sipas deklaratës së tatimit të thjeshtuar mbi fitimin.

4. Për të ardhurat individuale me burime jashtë Shqipërisë, të cilat janë tatuara në vendin ku janë realizuar ato të ardhura, do të lejohet kreditimi i tatimit të huaj në përputhje me nenin 37, të ligjit.
5. Plotësimi dhe paraqitja e deklaratës vjetore individuale të të ardhurave në administratën tatimore bëhet jo më vonë se data 30 prill e çdo viti për të ardhurat e realizuara në vitin paraardhës. Nëse tatimpaguesi rezulton me pagesë, pagesa e tatimit kryhet jo më vonë se data 30 prill.

Nëse diferenca sipas pikës 2 është negative, administrata tatimore i kthen individit deklarues shumën e tatimit të paguar më tepër ose, me pëlqim të tij, kjo shumë mund të përlllogaritet si pagesë e kryer për vitin tatimor vijues.”.

## **Neni 7**

Në nenin 18 bëhen këto ndryshime:

1. Pas shkronjës “ë” shtohet shkronja “f”, me këtë përmbajtje :

“f) Fondi i pensionit vullnetar i administruar nga shoqëria administruese e fondeve të pensionit vullnetar.”.

2. Në paragrafin e fundit, fjalët “... deri në shkronjën “ë”...” zëvendësohen me “... deri në shkronjën “f”...”.

## **Neni 8**

Në fund të nenit 20 shtohet një paragraf, me këtë përmbajtje:

“Shpenzimet për kontributet e bëra nga punëdhënësi në interes të punëmarrësve të tij në një plan pensioni profesional deri në shumën vjetore 350 000 lekë për çdo punëmarrës konsiderohen shpenzime të njohura.”.

## **Neni 9**

Në shkronjën “m”, të nenit 21, shtohet fjalia, me këtë përmbajtje:

“Brenda 6 muajve nga hyrja në fuqi e këtij ligji, Këshilli i Ministrave përcakton me vendim normativat për firot, humbjet, dëmtimet dhe skarcot gjatë prodhimit, magazinimit dhe transportimit etj, të njohura për qëllime fiskale.”.

## **Neni 10**

Në nenin 22 bëhen këto shtesa dhe ndryshime:

1. Në fund të pikës 3 shtohet paragrafi, me këtë përmbajtje:

“Në rastin kur vlera e mbetur e aktivit në fillim të periudhës tatimore është më e vogël se 3 % e kostos historike të këtij aktivit, atëherë kjo vlerë e mbetur do të njihet tërësisht si shpenzim i zbritshëm i periudhës tatimore.”.

2. Pika 5 ndryshohet, si më poshtë vijon:

“5. Dy kategoritë e mëposhtme të aktiveve amortizohen me metodën e vlerës së mbetur, në bazë të një sistemi grupimi, me përqindje, si më poshtë vijon:

- a) Kompjuterat, sisteme informacioni, produkte “software” dhe pajisje të ruajtjes të të dhënave me 25 për qind.
- b) Të gjitha aktivet e tjera të veprimtarisë me 20 për qind.

Në rastin kur vlera e mbetur e aktivitetit në fillim të periudhës tatimore është më e vogël se 10 % e kostos historike të këtij aktivi, atëherë kjo vlerë e mbetur do të njihet tërësisht si shpenzim i zbritshëm i periudhës tatimore.”.

### **Neni 11**

Fjalja e parë, e pikës 1, të nenit 33, ndryshohet, si më poshtë vijon:

“1. Të gjithë personat rezidentë në Republikën e Shqipërisë, organet e qeverisjes qendrore e vendore, organizatat jofitimprurëse dhe çdo subjekt tjetër, i njohur nga legjislacioni në fuqi, janë të detyruar të mbajnë tatimin në burim në masën 15 për qind nga shuma bruto e pagesave të mëposhtme, që lindin nga një burim në Republikën e Shqipërisë.”.

### **Neni 12**

Ky ligj botohet në “Fletoren zyrtare” dhe hyn në fuqi më 1 janar 2015.

**K R Y E T A R I**

**ILIR META**